

27/03/2001

Umat Islam perlu berani tentang gejala melampau

KUALA LUMPUR, Isnin - Umat Islam perlu menentang gejala bersifat melampau seperti meremehkan saudara seagama sebagai tidak Islam kerana unsur seperti itu hanya mencemar citra Islam itu sendiri.

Menteri di Jabatan Perdana Menteri, Brig Jen (B) Datuk Abdul Hamid Zainal Abidin, berkata umat Islam juga perlu berani menentang sebarang usaha merendahkan Islam yang fenomenanya didorong oleh barat.

Beliau berkata, gejala ekstremisme seperti sewenang-wenangnya meremehkan saudara seagama kononnya tidak Islam, menggunakan kekerasan yang tidak kena pada tempat dan waktunya dan lain-lain yang tidak melambangkan akhlak Islam itu sendiri, perlu ditentang.

"Gejala seperti itu sering memberikan imej negatif terhadap Islam dan umat keseluruhannya," katanya.

Beliau berkata demikian ketika berucap pada Perhimpunan Sambutan Maal Hijrah 1422 peringkat kebangsaan di Stadium Putra, Kompleks Sukan Bukit Jalil, hari ini. Perhimpunan itu bertemakan "Perpaduan Pemangkin Pembangunan Ummah"

Turut hadir, Yang di-Pertuan Agong Sultan Salahuddin Abdul Aziz Shah dan Raja Permaisuri Agong Tuanku Siti Aishah, Perdana Menteri Datuk Seri Dr Mahathir Mohamad dan timbalannya, Datuk Seri Abdullah Ahmad Badawi serta isteri masing-masing.

Abdul Hamid berkata, umat Islam tidak seharusnya menjadi umat pinggiran, sebaliknya menjadi teras, induk dan paksi kemanusiaan keseluruhannya.

Katanya, umat Islam harus insaf dan tidak melupakan bahawa Islam itu adalah milik mereka yang termahal dan hendaklah dipelihara dengan penuh rasa sayang dan cemburu.

Beliau berkata, perwatakan dan tingkah laku yang mengaibkan Islam akan hanya menutup segala kebaikan agama kerana masyarakat menghukum Islam itu melalui persembahan umat-umatnya.

"Islam agama yang cintakan kedamaian tetapi ditunjukkan umatnya sebagai suka kepada huru-hara. Islam mengajar bertolak-ansur tetapi ditunjukkan sebagai kejam dan bengis dan ia sungguh memalukan," katanya.

(END)